

**219,485 Kes Dokumentasi Tertunggak Diselesaikan  
Bernama  
14 Februari , 2012**

KUALA LUMPUR, 14 Feb (Bernama) -- Sebanyak 219,485 kes dokumentasi tertunggak seperti permohonan kewarganegaraan dan sijil kelahiran sejak lebih dua tahun lepas, telah diselesaikan sepenuhnya, kata Menteri Dalam Negeri, Datuk Seri Hishammuddin Tun Hussein.

Beliau berkata, jumlah itu meliputi 62,604 kes permohonan kewarganegaraan, 18,162 kes permit masuk dan 138,719 kes lewat daftar sijil kelahiran, tetapi ia tidak bermaksud semua permohonan adalah diluluskan.

"Selesaikan tak bermaksud semuanya lulus tetapi tak ada wujud lagi permohonan yang tertunggak dan sekurang-kurangnya pemohon tahu status permohonan mereka," katanya kepada pemberita di Majlis Penganugerahan Dokumen Pengenalan Diri Kempen MyDaftar di sini, Selasa.

Penganugerahan dokumen pengenalan diri kepada 100 pemohon dari Selangor dan Wilayah Persekutuan Kuala Lumpur di bawah kempen yang dilaksanakan kementerian itu menerusi Jabatan Pendaftaran Negara (JPN) serta Pasukan Petugas Khas Pelaksanaan Jawatankuasa Kabinet Masyarakat India (SITF) itu disempurnakan oleh Perdana Menteri, Datuk Seri Najib Tun Razak.

Turut hadir Menteri di Jabatan Perdana Menteri Datuk Seri G Palanivel yang juga Presiden MIC dan Menteri Sumber Manusia merangkap Pengerusi SITF Datuk Seri Dr S Subramaniam.

Mengenai kempen itu, Hishammuddin berkata ia adalah salah satu usaha nilai tambah dan Petunjuk Prestasi Utama (KPI) kementerian dalam mengatasi masalah kes-kes dokumentasi yang tertunggak.

Selain itu, beliau berkata kempen yang berbentuk pendekatan seperti itu akan diteruskan ke kawasan pedalaman terutamanya di Sabah dan Sarawak bagi menyelesaikan masalah dokumentasi yang selalunya melibatkan mereka yang tinggal di kawasan itu dan Orang Asli.

"Cadangan saya untuk menggerakkan pasukan sukarelawan kita seperti Rela dan JPAM (Jabatan Pertahanan Awam Malaysia) dan pihak Imigresen dan Pendaftaran...supaya isu ini tidak membelenggu rakyat lagi dan saya percaya bahawa mereka yang telah terima jawapan lulus atau tidak menghargai apa yang kita telah lakukan," katanya.

Source: <http://www.bernama.com/bernama/v6/bm/newsindex.php?id=645661>